

Sèlnan pa boliteronan so ta keda habri na Rio Canario

Minister Girigorie: Lo konstruí sèlnan nobo

WILLEMSTAD.- No ta bale la pena pa invertí den sèlnan di polis na Rio Canario. Na lugá di renobá esnan ku ta saka for di sirkulashon, ta mihó destiná e plaka ei pa konstruí sèlnan nobo, i esei ta loke gobièrnu ta bai hasi tambe. Asina Minister di Hustisia di Kòrsou, mr. Quincy Girigorie, a duna di konosé na prensa e siman aki. Segun e mandatarario t'asina ku algun siman pasá gobièrnu a tuma e desishon pa stòp ku uso di sèlnan tantu na Rio Canario komo Barber pa sera hende ya ku esaki no ta muchu responsabel pa sierto motibunan. E desishon definitivo a kai ku e sèlnan di polis na Rio Canario lo no ser usá mas, ku eksepsion di e 5 sèlnan ku ta ser usá pa personanan ku ta guli bolita.

E kompleho di sèlnan na Rio Canario tin dos grupo i pa dos uso diferente. Un grupo tabata ser usá simplemente pa sera hende ku keda detené, i e otro grupo pa sera boliteronan. E sèlnan pa bolitero ta ekipá speshalmente pa boliteronan por saka loke tin nan nan kurpa na bolita i pa outoridatnan hudisial por rekuperá esakinan i usa nan komo prueba despues. E sèlnan aki si lo tin di keda den operashon, pasobra ta e úniko sèlnan riba nos isla ku e fasilitatnan en kuestion i ku por ser usa di un forma efektivu i humano.

Di otro banda, si tin di bai hasi invershon pa por pone e otro sèlnan na Rio Canario na un nivel i di akuerdo ku normanan internashonal pa sera hende, anto ta mihó invertí e plaka ei pa traha

un sentro di detenshon nobo pa polis. Pero segun e minister e por antisipá bisando ku ya a start ku un trayekto pa a korto plaso kuminsá ku konstrukshon di un grupo di sèlnan di polis nobo. No ta bale la pena pa invertí un kantidat di sèn den e sèlnan bieu pa nan ta funshonal, siendo ku por traha sèlnan nobo. Pa loke ta trata e situashon na Barber, segun sr. Girigorie esaki ta diferente ya ku e problemanan no tin di aber ku e sèlnan mes sino ku seguridat. Apesar ku Barber tabatin sierto puntunan di desfunshonalidat, tòg e problema prinsipal tabatin di aber ku seguridat, tantu pa e detenidonan komo pa trahadónan. Pero pa trese un solushon den e situashon ei resientemente a tuma un desishon den kual praktikamente a dupliká

e kantidat di personanan den seguridat na Barber. Den e evaluashonnan a resultá ku esei ta suficiente pa por akapará Barber. E seguridat ta importante pa detenidonan i trahadónan. Tin otro asuntunan ku tambe a keda atendé, pero por bisa ku e sèlnan di polis na Barber ta funshonal atrobe. Segun Minister Girigorie, ku e desishon aki por bisa ku e kantidat di sèlnan ta suficiente, ya

ku tin di wak esakinan den kombinashon ku Blok-1 na SDKK. Ku e kantidat total ku tin e ta suficiente pa por detené i mantené hende den aresto preventivo. I ta bon

pa rekordá ku e sèlnan aki ta destiná pa mantené hende sera pa un máksimo di 10 dia den aresto preventivo pa despues nan por pasa over pa SDKK.